

Dictee 2017 door Rien Jansens

1. Poovlie is een klein mà prachtig durp mee een ieselijk groôte polder.
2. Dae weune zo à een zestien'onderd mènsen.
3. Krijn de Groene was vroeger de durpsomroeper, vò een kwartje wist iedereên wat à d'r loos was.
4. We 'ao wè vuuf bakkers op 't durp: bakker Janse, Wessels, Strijd, de Graof en às lèste bakker Feytel.
5. 'Eintje Yseldiek was een ahosiant, dae kò je aolles koape, van schutteldoek tot pillen vò koppiene.
6. Mènsen vraege wè 's an mien: "Wae kom je vandaen?" "Uut Poovlie", zèg 'k dan.
7. "O, van de Weunboulevard", is meêstà 't antwoord.
8. Dan mò 'k wè een bitje lache, omdat d'r zo vee is veranderd in aol die jaeren.
9. Zelf bin 'k 'r gebore en getoge zà 'k mà zègge.
10. M'n vaoder was 'uusschilder bie Ouwesluus.
11. Die most de kezieneen nog schure mee een puumsteên.
12. Spele dà gieng 'k an 't waeter doe, 't liefst bie de diek an de Schelp'oeck.
13. Mee m'n neef 'è 'k bie 't stoomgemaek nog 's een vlot gemaekt.
14. Mà die veint van 't waeterschap 'ao een dag van te voren die boamstammen net uut 't waeter g'aele.
15. Dus je kan wè begriepe dà die nie zo blieë mee ons was.
16. Onderlesten zat d'r een scheure in de klokke van de groôte kèrreke.
17. 'È m'n toch vier maenden zonder geluud gezete.
18. Ik weune vlak in de buurte, kà je wè vertelle dà 'k 't nie zo 'eêl èrrig gevonden 'è.
19. 't Is de zwaerste belle van 't eiland, dus dat maek een leven às een oordeêl.
20. Mà goed; zo kan een toren nie zonder klokke en Poovlie nie zonder Poovliesenaers.